

## A PITA GÃN NA DE NIE

<sup>I</sup> Maa Pita na ɪ a Yesu Kırısto nıtõnãa le sɛɛɛ a gãn nyã korɔ a yɪn a Nãanmɪn na chel ir a yɪ ɪ sãanba yẽyel ka a wer pɔ, na yɪ be a Pontus, nɪ Galatiya, nɪ Kapadosiya, nɪ Asiya, nɪ a Bitiniya.

<sup>II</sup> A Sãa Nãanmɪn den nie bõɔ yɪ, ka a wɔ Sɪɛ oo yɪ, a yɪ ɪ cheche, yɪn wõnõ a Yesu Kırısto toor jũu, ka wɔ mur yɪ a wɔ jãɪ. Wãɛfɔ nɪ nyã'maar na dɔɔɔ yɪn taa.

<sup>III</sup> Pɛɛfɔ wɔ ta a Nãanmɪn na ɪ a sɪ Soro Yesu Kırısto Sãa! A wɔ nɪbaal berma naa, ka wɔ dɔɔ sɪ dɔɔ paalaa, na wɔ kɔ sɪ tɛɛɛɛ vor tu a Yesu Kırısto won sãɪ a kũu pɔ, <sup>IV</sup> nɪ a nãbomo ala won bin gun sɪ be a saaju, a ba werɛ ɛ, a ba sõɔnõ ɛ, bɪ jɔɔɔ ɛ. <sup>V</sup> A tu naa yɪ sɔɔfɔ pɔ, ka a Nãanmɪn Kpẽɔ ger pɔɔ yɪ, tɪ tãn a bɪbir baaraa 'lɔ a faafɔ 'lɔ na choɔr baar na wa nyɪr. <sup>VI</sup> A anyãna pɔ le yɪ chɪle yɔɔ jaa, an sɔɔ ɪ ɪka yɪn dɪn dɔɔyɛ bɛɛr kaa bɔrɔ bɔrɔ pɔ. <sup>VII</sup> A anyãna wa naa ka a yɪ sɔɔfɔ na kpẽme gar a selma na ɪ bõsõnãa ban ma dɔɔl bũu pɔ ir a dɛɛr bar. A yɪ sɔɔfɔ na lɛb ɪ pɛɛfɔ, nɪ tur, nɪ 'yõɔfɔ a sõɔ 'lɔ a Yesu Kırısto na wa nyɪr. <sup>VIII</sup> Yɪ gba na ba nye wɔ ɛ, tɪ na yɪ nõ wɔ. Yaa gba nye wɔ a põpãanyã ɛ, tɪ sɔɔ wɔ, na yɪ seen a popel tur 'lɔ nɪre na kõ tõɔ man ɛ. <sup>IX</sup> Bojũu yɪ nyere naa a yɪ sɔɔfɔ bon na ɪ a yɪ sɪr faafɔ.

<sup>X</sup> A faafɔ nyã 'yer le a Nãanmɪn 'ye'yerbe dõɔ 'yer a wãɛfɔ nyã na wa a yɪ sɛ. Ba vɪɛr naa a

faafɔ nyã na ba chẽpẽ wɔ jaa nɛ nɛ. <sup>XI</sup> Ba mɔɔn nɪbir ɪka ba bɔɔ a sɔɔ nɪ a yelsɪ ala a Kɪrɪsɪto Sɪɛ na be a ba sɛ na wile ba, a lɛ won 'yer a dɔɔyɛ a Kɪrɪsɪto na di nɪ a tɪr ala na turo. <sup>XII</sup> Nãanmɪn wiil naa a wɔ 'yɛ'yɛrɛ banyãna ɪka a ba ɪ ba mãɛ 'yɔɔ lɛ ba tɔnɔ a lɛ ɛ, tɪ chɛ yɪn 'yɔɔ lɛ. A lɛ ban 'yer a nyãna yɪn ben wɔnɔ a pɔpãanyã a bala na mɔɔlɔ a 'yer nɔɔ tu a Nãanmɪn Sɪɛ won tɔ a wɔ yi a saaju. A malakasɪ mɪ gba ta bɔɔɔ naa ɪka ba muul kaa a anyãna.

<sup>XIII</sup> A lɛ jũu, yɪ chɔɔr a yɪ tɪɛr gun tɔmɔ, na yɪ nyɔɔɔ yɪ mãɛ. Yɪ de a yɪ tɪɛrtɔ 'yɔɔ a wãɛfɔ 'lɔ a Yesu Kɪrɪsɪto na kɔ yɪ a wɔ waa daar. <sup>XIV</sup> Yɪn wɔnɔ a Nãanmɪn toor jũu, yɪ taa lɛ maala a kɔro mamaalbie ɛ, a lɛ yɪn ba dɔɔ bɔɔ ɛ. <sup>XV</sup> Tɪchɛ nɪtãa lɛ a 'lɔ na bɔɔl yɪ na ɪ chechɛ, yɪ mɪ ɪ chechɛ a yɪ yelmaalsɪ a jaa pɔ. <sup>XVI</sup> Bojũu a seb ɪka, “Yɪ ɪ chechɛ, bojũu n ɪn chechɛ.” (*Mosesɪ Gãma Na Tu Ata 19:2*)

<sup>XVII</sup> Yɪn ma bɔɔlɔ wɔ a yɪ Sãa, 'lɔ lɛ na tɔɔr nɪɛ jaa 'yer, na waa turo ɛ, yɪ kpɪɛɛ a yɪ kpɛfɔ nɪtãa sãanba, na yɪ joro wɔ dãbãɛ. <sup>XVIII</sup> Bojũu yɪ bɔɔn naa ɪka a ba ɪ bɔsɔɔnãa fɪka libir, bu selma lɛ Nãanmɪn de yab den yɪ yin a yɪ sãakpãmɪne yelpɔrsɪ ala na lũ yɪ pɔ ɛ, <sup>XIX</sup> tɪchɛ a ɪ naa a Kɪrɪsɪto jãt vɪla ala na ɪ a pɛraabile na ba tara chɛfɔ ɛ, bu jãnɛ jaa ɛ. <sup>XX</sup> Nãanmɪn ir wɔ naa tɪ wa bɪɛr maal a wɛr, tɪchɛ wɔ vɛn ka wɔ nyɪr a sɔɔ baaraa a yɪ jũu. <sup>XXI</sup> A wɔ jũu lɛ yɪ sɔɔ de a Nãanmɪn na ir wɔ a kũu pɔ na wɔ kɔ wɔ tɪr, ka a yɪ sɔɔfɔ nɪ a yɪ tɪɛrtɔ na be a Nãanmɪn 'yɔɔ.

<sup>XXII</sup> Pɔpãanyã yɪn chɔɔr a yɪ mãɛ yɪn turo a

yelmãe jũu, yɪ nõnõ naa a yɛɛr sɪɛ jaa. Yɪ nõnõ taa nɪ a yɪ nyãa wɔ jaa. <sup>XXIII</sup> Bojũu yɪ nyɛn dɔɔ paalaa 'lo na ba ɪ bõkpiraa ɛ, tɪche won ben be, na ba tu a Nãanmɪn 'yer na ɪ vɔr, na be be bɪbir jaa. <sup>XXIV</sup> Bojũu, “Nɪsaal kaara naa fɪka mɔɔr, ka a ba tɪr wɔ jaa kaara fɪka a mɔpuul. A mɔɔr wa jɔɔl, a puul mɪ ma suor naa. <sup>XXV</sup> Tɪche a sɪ Soro 'yer 'lo ben be bɪbir jaa.” (*Isaiya 40:6-8*) A 'yer nyãana lɛ ba mɔɔl kɔ yɪ.

## II

<sup>I</sup> A lɛ jũu, yɪ ir yɪ mãe yɪn a yosɔɔ 'yer, bɛlfɔ, nɛɛr ayi tarfɔ, nyuur, nɪ kporfɔ jaa bɔrɔ pɔ. <sup>II</sup> Yɪ kaara fɪka bipule, na yɪ bɔrɔ a Nãanmɪn 'yer ka ɪ yɪ vɔlaa a bɪr kaar, a yɪn tɔɔ nõɔ a yɪ faafɔ pɔ, <sup>III</sup> bojũu an ɪ yɪ lɛm kaa lɛ a sɪ Soro na nõmõ.

<sup>IV</sup> An ɪ yɪ wa naa a wɔ sɛ na ɪ a Kɔsɪr vɔr a nɪsaal na tɔr bar, tɪche ka a Nãanmɪn ir wɔ a wɔ ɪ bõsõ, <sup>V</sup> yɪn mɪ na ɪ fɪka a kɔsɪvɔɛ a ba men yɪ, nɪ a Nãanmɪn yir ka yɪ ɪ a wɔ bɔɔrlo chechesɪ, na yɪ loro a wɔ bɔɔr won sɔɔ tu a Yesu Kɪrɪsto 'yõɔ. <sup>VI</sup> A sɛb a Nãanmɪn gãn pɔ ɪka, “Nyɛ, n bin a kɔsɪr be a Jiyon tɛɛ pɔ, a kɔsɪr vɪla 'lo ɪn kaa ir ka wɔ ɪ a kɔsɪr ju, ka nɪrɛ 'lo jaa na sɔɔ de wɔ, vã kõ di wɔ ɛ.” (*Isaiya 28:16*) <sup>VII</sup> Põpãanyã a yɪn bala na sɔɔ de wɔ, wɔ ɪn kɔsɪr sõ. Tɪche a bala na ba sɔɔ de wɔ ɛ, “A kɔsɪr 'lo a mɪmɪɛrbe na tɔr bar, 'lo lɛ ɪ a kɔsɪr ju,” (*Yiel Gãn 118:22*)

<sup>VIII</sup> na, “Wɔ ɪ a kɔsɪr 'lo a nɪbe na ŋmiere a gbɛɛ, na wɔ ɪ a pie 'lo ban bãra loro.” (*Isaiya 8:14*) Ba ŋmiere naa ba gbɛɛ bojũu ba tɔr naa a 'yer 'lo 'yõɔ a Nãanmɪn na dõɔ bin ba.

**IX** Tiche yin 'lo, Nāanmɪn lɛ ir yɪ a yɪ ɪ a wɔ bɔɔrlo nāmune, na yɪ ɪ nɪchechesɪ, na yɪ ɪ a Nāanmɪn sofo, ka yɪ na pɛɛɛ wɔ, an ɪ 'lo lɛ bɔɔl yɪ yin a libe pɔ waan a wɔ chāa herete pɔ. **X** Yaa dɔɔ ɪ a wɔ nɪɛ ɛ, tiche pɔpāanyā yɪ ɪ naa a Nāanmɪn nɪɛ. Yaa dɔɔ tara a Nāanmɪn nɪbaal ɛ, tiche pɔpāanyā yɪ tara wɔ naa.

**XI** N barmune, n sɔɔɔ yɪ naa nɪtāa nɪyɔɔrsɪ nɪ sāanba ka a wer pɔ ɪka, yɪ ir yɪ mǎɛ yin a āgān vɔlaa na ma jɛɛɛ nɪ a yɪ sɪr. **XII** Yɪ kpɪɛɛ vɪla a bala na ba puoro sɛ, ban sɔɔ gba kpɛɛ yɪ ɪka dɛɛr lɛ yɪ maala, bala wa nyɛ a yɪ vɪla maalfɔ ban 'yɔɔn Nāanmɪn tɪr a wɔ waa bɪbir.

**XIII** A sɪ Soro jūu, yɪ siir yɪ mǎɛ kɔ a tɔɔfo dɛme, ala sɔɔ ɪ a nākpɛɛ 'lo lɛ, **XIV** bɪ a nābil bala won ir bin a tɛn tɛn ka ba kpāana a bala na maala dɛɛr tɪ pɛɛɛ a bala mɪ na maala a lɛ na tor. **XV** Bojūu Nāanmɪn bɔfo lɛ ɪka yin maala vɪla na yɪ pɔɔ a ba bɔɔ dɛme na ɪ a jɔlɔ nɛɛr. **XVI** Yɪ kpɪɛɛ nɪtāa sumune, tiche yɪ taa de a mǎɛ sofo nyā pɔɔn yelbier ɛ, tɪ yɪ kpɪɛɛ fɪka Nāanmɪn gbāgbaar. **XVII** Yɪ 'yɔɔnɔ nɪɛ jaa na yɪ nɔ a yɪ taa Yesu turbo, na yɪ joro Nāanmɪn dābāɛ, tɪ 'yɔɔnɔ a nāa.

**XVIII** Gbāgbaar, yɪ siir yɪ mǎɛ kɔ a yɪ tɔnbo nɪ 'yɔɔfo, a ta ɪ a bala na bal nɪbir maala yɪ vɪla tɛɛ ɛ, tiche a bala mɪ na kpɛɛmɛ a nɪbir. **XIX** Bojūu a Nāanmɪn na maal vɪla kɔ nɪɛ 'lo na tara tɪɛr vɪla, na wɔ di dɔɔyɛ na ba tara sɔɔr ɛ, bojūu wɔ tara na Nāanmɪn tɪɛr. **XX** Tiche bo lɛ na ɪ a yɪ tɔnɔ, ala ɪ ba ŋme yɪ naa yin tɔ dɛɛr jūu? Tiche ala ɪ yɪ din dɔɔyɛ yin maal vɪla jūu, an

un tǒnǒ kɔ yɪ Nāaŋmɪn niem. <sup>XXI</sup> A anyāna jūu le a Nāaŋmɪn bɔɔl yɪ, bojūu Kirusito mɪ dǔɔ di dɔɔye, na wɔ maal wiil yɪ ɪka yɪ turo a wɔ pala. <sup>XXII</sup> “Ka waa dǔɔ maal dɛer jaa ε, bɪ ka belfɔ yɪ a wɔ nɛε pɔ ε.” *(Isaiya 53:9)* <sup>XXIII</sup> A le ban dǔɔ torɔ wɔ, waa mɪ to yaa a sǎn ε. A dɔɔye na pɔɔ wɔ, waa jo dābāε ε. Tiche wɔ den a wɔ mǎε kɔ a Nāaŋmɪn na tɔɔrɔ a 'yer jaa dē dē. <sup>XXIV</sup> A wɔ mǎε le tuo a sɪ yeldebε a wɔ āgān pɔ a daa ju, ka sɪ mɪ na kpi kɔ yelbier tɪ be be kɔ yeltorsɪ. A wɔ fɛle ala jūu le sǎa sɪ. <sup>XXV</sup> Na yɪ kaara fɪka piir na dǔɔ bɔrɔ, tiche pǔpāanyā yɪ lieb wa a pechine na kaara a yɪ sur sē.

### III

<sup>I</sup> Pɔbɔ, a le nɪ wɔ ju mɪ le, yɪ sur yɪ mǎε kɔ a yɪ sɪrbe. Bamine baa sɔɔ puor ε, tiche a yɪ befɔ na tǔɔn lieb a ba tier a ba puoro, <sup>II</sup> bala wa nye a le a yɪ maalfɔ na ɪ vɪla, nɪ le yɪn 'yǔɔnǒ a yɪ mǎε. <sup>III</sup> Yɪ ta vē ka a yɪ vɪla ɪ a yǔo pǎefɔ tee ε, nɪtāa a ju wobfɔ, selma bǔjɔrsɪ yarfɔ, nɪ a fɔnɪbɪkpāen sefɔ ε. <sup>IV</sup> Tiche yɪ vē ka a yɪ pǎefɔ be pɔɔm na ba jɔɔlɔ ε, na ɪ vɪla, hɛ le le le, nɪ jomm, ala le ɪ vɪla a Nāaŋmɪn niem. <sup>V</sup> Bojūu nɪtǔnǒ le a mama pɔɔsǔn bala na tara a Nāaŋmɪn tier ma maal a ba mǎε vɪla. Na ba sɔɔ turo, na ba sur ba mǎε kɔ a ba sɪrbe. <sup>VI</sup> Le mɪ le a Saara na dǔɔ wǔnǔ a Abraham toor na wɔ ma bɔɔlɔ wɔ a wɔ sorɔ. Yɪn le ɪ a wɔ bibiir, ala ɪ yɪ maala na a le na vɪle na yɪ kǔ joro dābāε ε.

<sup>VII</sup> Sɪrbe a le nɪ wɔ ju mɪ le, yɪ tierε a yɪ pɔbɔ yɪn lǔɔ kpiere nɪ. Yɪ kaara ba nɪ 'yǔɔfɔ, bojūu baa tara kpāen jǎ yɪ ε, tɪ na ba pɔɔ yɪ a Nāaŋmɪn

wãefo kofu 'lo na ı nyevor, ka bon jaa taa var a yı Nãanmın suorfu ε.

**VIII** A 'yer baaraa le a anyã, yı jaa yı tara tıer bõ'yen, na yı kaara taa nıbaal, na yı nõ taa maala vıla kuro taa nı mãe siirfu. **IX** Yı ta de yelbier yãan yelbier sãn ε, bı tıbir yãan tıbir sãn ε, tıche yı 'yer nevıla 'yõ ba, bojũu a anyã 'yõ le a Nãanmın bıol yı ıka yın nyen sõofu. **X** Bojũu, "Ala ı nıre nõn nyevor na wõ bõro bıbıvıelı wõ ir wõ nee yın 'yerdeer nı belfu põ. **XI** Wõ lıeb puor 'yõ yelbier tı maala vıla, na wõ bõro nyã'maar joro turo a wõ puor. **XII** Bojũu a sı Soro kaara naa a bala na tor, na wõ wõnõ a ba suorfu. Tıche a sı Soro põ ma sõo naa nı a bala na ma maala yelbier." *(Yiel Gãn 34:12-16)*

**XIII** An le na ge yı ala ı yı mõo nıbir maala vıla? **XIV** Tıche ala ı yı gba din dõoye yın maala vıla jũu, Nãanmın na sõo yı naa. "Yı ta joro dãbãe nı a ba vuurfu ε. Yı taa joro dãbãe ε," *(Isaiya 8:12)* **XV** Tıche a yı nyãn põ, yı 'yõnõ a Kırısıto na ı a yı Soro. Na yı ma chõor sõo jaa ala ı nıre wa suor yı naa a tıerto 'lo yın tara, tıche yı ma man naa jomm nı 'yõofu, **XVI** na yı vẽ ka a yı tıer chaar, ka a bala na sõonõ a yı yuor yın turo a Kırısıto jũu, ka vã na kpe ba, nı a ba yosõo 'yer. **XVII** An ın vıla ala ı Nãanmın bõfu le, yın dı dõoye vıla maalfu jũu, gar yın na dı dõoye deer maalfu jũu. **XVIII** Bojũu Kırısıto kpi naa a yı yelbier jũu gbẽbõ'yen tẽe, a 'lo na tor kõ a bala na ba tor ε, ıka wõ waan yı Nãanmın sẽ. Ba kõ naa a wõ ãgãn, tıche ka a Nãanmın Sıe sãu wõ a kũu põ, **XIX** a Sıe nyã le a Kırısıto chiin a

kpīi tēe na wɔ tɪ mɔɔl kɔ a kpīisi bala na be a pɔɔfɔ die pɔ. **XX** A banyāna le tor a Nāanmɪn nɛɛ, tɪche ka wɔ di kānyir ka a Nowa wa maal a daka bulomtum baar. A nɪɛ bālāa na ɪ aniin tɛɛ wa nyen faafɔ a kɔɔ pɔ. **XXI** A kɔɔ nyā nyetāan fɪka a Nāanmɪn kɔɔ sofɔ na faa yɪ mɪ a pɔpāanyā, a ba ɪ āgān dɛɛr pɛɛ barfɔ le ɛ, tɪche a nɛɛ yɪn tɪr kɔ Nāanmɪn nɪ pɔtɪvɪla. Yɪ nyen faafɔ tu a Kɪrɪsto kūu irfɔ pɔ. **XXII** 'Lo le do a saaju tɪ jānɛ, a Nāanmɪn nūsɔɔ jɪe ka a malakasɪ, nɪ a tɔɔfɔ dɛmɛ, nɪ a kpāɛn dɛmɛ ba jaa turo a wɔ nɛɛ.

## IV

**I** A le jūu, a Kɪrɪsto na di dɔɔyɛ a wɔ āgān pɔ, yɪ mɪ su a tājebonsɪ ala gun a tɪɛr 'lɔnɔ, bojūu a 'lo na di dɔɔyɛ a wɔ āgān pɔ ba le pɔɔ yelbier pɔ ɛ. **II** Ala le so, wɔ ta le kpɪɛɛ a wer pɔ nɪ a āgān vɔlaa ɛ, tɪche wɔ kpɪɛɛ a le a Nāanmɪn na bɔɔɔ. **III** Bojūu a kōro jaa, yɪ mɪ sɔɔn sɔɔ na yɪ maala a le a bala na ba puoro ɛ, na maala, na baa tɔɔɔ a ba māɛ nyɔɔɔ ɛ. Ka a āgān vɔlaa, nɪ dāburo, nɪ a pepe dib, na yɪ pɔɔ a dānyurbo gbul pɔ, na yɪ maala tɪɛ na sɔɔnɔ a Nāanmɪn nɛɛ. **IV** Ban tɪɛr naa ɪka yelsāan le, yɪn ba le pɔɔ ba a befɔ 'lɔnɔ pɔ ɛ, ka ba pāa piel tɔɔɔ yɪ. **V** Tɪche ban man a ba nɛɛ 'yer kɔ a Nāanmɪn na wa tɔɔɔ a vɔɛ nɪ a kpīisi 'yer. **VI** A anyāna jūu le so ka ba gba mɪ mɔɔl a 'yer nɔɔ kɔ a kpīisi, ɪka ban tɔɔɔ a ba 'yer nɪtāa le ban na tɔɔɔ nɪɛ jaa 'yer, tɪche ka ba kpɪɛɛ a sɪr pɔ Nāanmɪn kaar.

**VII** A bonsɪ a jaa baarfɔ tara naa, a le jūu yɪ mɔɔ nɪbir na yɪ kpāa a yɪ māɛ tɔɔ sɔɔɔ Nāanmɪn.

**VIII** A ala na gar a jaa le a anyā, yɪ chɛnɛ vɛ ka a

nõfo be a yɪ pɔ, bojũu nõfo ma pɔon yeldɛbe yɔɔ. **IX** Yɪ ma diere taa a yɪ yie tɪ ta ma ɪre gburɔ̃ gburɔ̃ ɛ. **X** ɪsɔɔ jaa wɔ de a Nãaŋmɪn kɔfɔ won nye tɔ̃nɔ̃ kɔrɔ nɪ a wɔ taaba nɪ yelmãe nɪ a Nãaŋmɪn wãefɔ a jaa. **XI** Ala ɪ nɪre jaa 'yere na, wɔ 'yere a Nãaŋmɪn 'yerbie ala. Ala ɪ wɔ ɪn tɔ̃tɔ̃nɔ̃, wɔ tɔ̃nɔ̃ nɪ a kpɛɔ 'lɔ a Nãaŋmɪn na kɔ wɔ, ka a yele a jaa pɔ, ka Nãaŋmɪn nye tɪr tu a Yesu Kɪrɪsɪto pɔ. 'Lɔ le so a tɪr nɪ kpɛɔ bɪbɪr bɪbɪr jaa. A ɪ a ɪɛ.

**XII** N yere nɔ̃nɔ̃nbɔ, yɪ ta vɛ ka nɛɛ 'maa yɪ nɪ a beer kaa tuo na vulo yɪ fɪka yelsãan kɔɔ le ɪre yɪ ɛ. **XIII** Tɪche yɪ chɪle an ɪ yɪ pɔɔ naa a Kɪrɪsɪto dɔɔye difɔ pɔ, ka nɔɔ na kpe yɪ a wɔ tɪr wa nyɪr. **XIV** Ala ɪ ba tɔ yɪ naa yɪn bɔɔlɔ a Kɪrɪsɪto yuor jũu, Nãaŋmɪn na sɔ̃ɔ yɪ naa, bojũu Nãaŋmɪn Sɪɛ ben a yɪ 'yɔɔ. **XV** Ala ɪ yɪ din dɔɔye, a ta ɪ fɪka nɪkɔrɔ, bɪ nãnyie, bɪ nɪdɛɛr, bɪ tɔ'yɔ̃ɔnbɔ le yɪ ɪ ɛ. **XVI** Tɪche ala ɪ a yɪ ɛsɔɔ jaa wa dire na dɔɔye won turo Kɪrɪsɪto jũu, wɔ ta vɛ ka vã kpe wɔ ɛ, tɪche wɔ pɛere Nãaŋmɪn a yuor nyã won di jũu. **XVII** Bojũu a 'yer tɔɔrfɔ sɔɔ ta naa, ka Nãaŋmɪn na piel tɔɔrɔ a wɔ nɪbe 'yer. Ala ɪ sɪn le won piel, ŋmɪne le an kaara kɔ a bala na tɔr a Nãaŋmɪn 'yer nɔɔ? **XVIII** A seb ɪka, “Ala ɪ an ɪn kpɛɔ kɔ a nɪtor, ŋmɪne le an kaara kɔ a bala na bã puor ɛ, nɪ a yelbe-ɪrbe?” *(Sokpar Gãn 11:31)*

**XIX** A le jũu, vɛ a bala na dire a dɔɔye a Nãaŋmɪn bɔfɔ jũu, de ba mãe kɔ a Nãaŋmɪn yelmãe sɔɔ na me ba, tɪ mɔɔ nɪbɪr maala vɪla.

## V

<sup>1</sup> A maa na ɪ a nɪdiere naa nye a Kɪrɪsɪto dɔɔye



ni nɪbir, naa mi ɪ nure nyã na pɔɔ a tur 'lo na wa nyɪr, n 'yɔɔnɔ na a nɪdierbe na be be a yi pɔ ãkpãen, <sup>II</sup> ɪka ba kaara a Nãanmɪn piir a won de 'yɔɔ a yi nuur pɔ, na yi tɔnɔ kaara ni ba, a ta ɪ firfɔ ε, tɪche a ɪ yi bɔfɔ, bojũu le le a Nãanmɪn bɔɔɔɔ. A ta ɪ libie 'yɔɔ ε, tɪche ka a nɔmɔ yi a tɔfɔ. <sup>III</sup> Yi ta pirpire a bala yɪn kaar ε, tɪche yi ɪ jãne kɔ a piir. <sup>IV</sup> A pɛchiin gbɔɔraa wa wa, yɪn nyen a sãyar na ɪ a tur na ba jɔɔl ε.

<sup>V</sup> Le ni wɔ ju mi le a yɪn bala na ɪ a pɔlbil, yi siir yi mãe kɔ a yi nɪdierbe. Yi jaa jaa yi ma siir yi mãe na yi ma tɔnɔ kɔɔ taa, bojũu a seb ɪka, “Nãanmɪn 'laar a bala na 'mɔɔɔ a ba mãe, ti ma sɔnɔ a bala na ma siir ba mãe.” (*Sokpar Gãn 3:34*) <sup>VI</sup> A le jũu, yi siir yi mãe a Nãanmɪn kpɛɔ sɔɔ nuur pɔ, ka wɔ 'mɔɔ yi a yi do a sɔɔ 'lo won bɔɔɔɔ. <sup>VII</sup> Yi de a yi yelwɔnsɪ a jaa kɔ wɔ, bojũu 'lo le 'yɔɔnɔ a yi tɔɔ.

<sup>VIII</sup> Yi gu yi mãe na yi 'yɔɔnɔ jũmɔ, a yi dɔsɔɔ tɪ kaara naa jukpɛɛ kaar, na uoro yɔɔɔ na wɔ pãa kaara bɔɔɔɔ nure ɪka wɔ nyɔɔ 'wɔb. <sup>IX</sup> Yi var wɔ sɔɔ, na yi ba gber ara a yi sɔɔfɔ pɔ, bojũu yi bɔɔn naa ɪka a yi taaba na be a wer wɔ jaa, mi dire na a dɔɔye nyãna tɔ yɪn dire.

<sup>X</sup> Yɪn wa di a dɔɔye nyãna bãlãa a Nãanmɪn na ɪ a wãefɔ sɔɔ a 'lo na bɔɔl yi 'yɔɔ a tur nyã na ba tara baarfɔ pɔ a Kɪrɪsɪto 'yɔɔ, wɔ mãe na maal yi naa na wɔ 'yɔɔ yi ãkpɛɔ tɪ na wɔ vɛ a yi ara kpɛɔ kɔ dãm ε. <sup>XI</sup> 'Lo le so a kpɛɔ bɪbir ni bɪbir jaa. A ɪ a le.

<sup>XII</sup> Silasɪ na ɪ a yebe yelmãe sɔɔ le sɔsɔ ma ka n seb a gãn bile nyãna, naa 'yɔɔn yi ãkpãen din

dãasɛ ɪka anyãna le ɪ a Nãanmɪn sɪɛ wãɛfo.  
Yɪ ara kpɛɔ. <sup>XIII</sup> A yɪ taaba pupuorbiir na be a  
Babilon Nãanmɪn na 'mataa ir yɪ, puor yɪ naa,  
ka a n bidaba Maaki mɪ puoro yɪ. <sup>XIV</sup> Yɪ puor  
puor taa ni nõfo. Nyã'maar wɔ be a yɪn bala na  
be a Kɪrisɪto 'yɔɔ.

**A Nãanmun Nɛtur Oaalaa Gãn, Burfoor  
Birifor, Southern: A Nãanmun Nɛtur Oaalaa Gãn,  
Burfoor New Testament**

copyright © 2006 Wycliffe Bible Translators, Inc.

Language: Birifor, Southern

Contributor: Aramaic Bible Translation, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

97b1f1fe-19fd-52d9-9481-ad2a6ade2772